

# Tā mātou tikanga mahi tahi i a koe

He kohikohi moni tā te Tari Taake hei utu i ngā ratonga mō te iwi whānui. Āwhina ai mātou kia tutuki i ngā tāngata ā rātou herenga, kia whiwhi hoki rātou ki ngā ratonga e māraurau ai rātou. Mahi ai mātou mā roto o ngā Ture o te Tari Taake me ērā atu ture ka whai pānga, otirā ka hāngai hoki ā mātou mahi ki te wairua o te Tiriti o Waitangi.



## Tā mātou tikanga mahi tahi i a koe

- Ka ngāwari noa mātou hei mahi tahi, ka tere, ka rawe, ka ngaio hoki.
- Ka mahia rawa tā mātou e kī ka mahia.
- Ka aro tonu mātou ki ngā matea takitahi, matea ahurea, matea motuhake hoki.
- Ka homai tōna ingoa e te tangata e mahi tahi ana i a koe.
- Uaratia ai e mātou ō urupare, ka whakamahia hoki hei whakapai ake i ā mātou ratonga.



## Te tohutohu me te pārongo pono

- Ka hoatu e mātou te tohutohu me te pārongo pono ki a koe mō ngā mea e māraurau ai koe, mō ō herenga hoki.
- Ka āwhina mātou i a koe kia taea e koe te whakapā atu ki ngā tāngata tika hei āwhina i a koe.
- Ka pērā mātou i te hunga kua whakangungu rawatia, i te hunga matatau.
- Ka kimi tonu mātou i ngā tikanga pai ake hei whakarato ki a koe i te tohutohu me te pārongo.



## Te noho matatapu

- Ka whakahaeretia e mātou ō pārongo katoa ānō he mea muna, matatapu, ā, ka āta pupuritia. Ka whakamahia anake ēnei ki tā te ture e whakaae ai.



## Te tikanga rite me te tikanga ōrite

- Ka whakamahia te ture e mātou i runga i te tikanga rite kia whiwhi tēnā, tēnā ki āna i tika ai, kia utua hoki e ia te nuinga tika.
- Ka whakaarotia rawatia hoki e mātou ōu āhuatanga ake ki tā te ture hoki e whakaae ai.



## Tōu motika ki te uiui i a mātou

- Ka meatia e mātou kia ngāwari mōu te uiui i ngā pārongo, ngā tohutohu me ngā ratonga ka whakarato mātou. Ka whakapuakina hoki e mātou ngā kōwhiringa mōu ki te kore koe e whakaae tahi me mātou, ā, ka mahi tahi mātou i a koe kia taea wawe ai, kia taea māmā ai he otinga.



**Robert Russell**  
Commissioner of Inland Revenue